



Mottakarar etter adresseliste

Høyring - eventuell grensejustering mellom kommunane Hornindal og Stryn - Kjøs grunnkrins (Markane) - frist 22.11.2017

Fylkesmannen mottok 31. august 2016 eit innbyggjarinitiativ frå Per Ove Kjøs og Andreas Solvik om justering av kommunegrensa mellom Stryn og Hornindal. Det ligg føre to alternativ til ny grense i søknaden, men begge forslaga vil medføre at ein del av Hornindal kommune blir flytta til Stryn kommune, jf. tidlegare tilsende søknad.

Innbyggjarinitiativet vart 12.06.2017 omtala i Fylkesmannen sitt brev om vidare arbeid med grenseendringar. Her tilrådde Fylkesmannen at det vart satt i gong utgreiing av grensejustering.

Stortinget vedtok 08.06.2017 å slå saman Hornindal og Volda til ein ny kommune. Den nye kommunen skal ligge i Møre og Romsdal fylke. Det betyr at grensa mellom Stryn og den nye kommunen blir ny fylkesgrense. Det er denne grensa søknaden om grensejustering gjeld.

Kommunal- og moderniseringsdepartementet (KMD) ga i brev motteke 04.07.2017 Fylkesmannen i oppdrag å greie konsekvensane av ei grensejustering så raskt som råd.

Fylkesmannen hadde 12.7.2017 eit informasjonsmøte med dei involverte kommunane om saka. Der vart det opplyst om aktuelle tema for innhenting av informasjon, og at det var planlagt ei innbyggjarundersøking i området. Førebels tidsplan for utgreiingsoppdraget vart også lagt fram. Kommunane vart også oppmoda om å sende inn fakta og informasjon dei meinte var relevant og nødvendig i saka, uavhengig av om det sto på lista over aktuelle tema.

20.07.2017 fekk Hornindal kommune i oppdrag å greie ut frakta knytt til brukarar, kultur, økonomi, kommunale tenester, fylkeskommunale tenester, statlege tilbod, naturressursar, pendling, planar, kommunikasjon og interkommunalt samarbeid i området. Slik utgreiing vart motteke 18.09.2017, og ligg vedlagt. Stryn vart i same brev oppmoda til å komme med innspel på område dei vurderte det var naturleg å uttale seg. Slik uttale mottok vi 18.09.2017, jf. vedlegg.

Det vart bestemt 24.08.2017 at Opinion fekk i oppdrag å gjennomføre innbyggjarundersøkinga. Denne vart levert 15.09.2017, og viste at det er delte meiningar om kommunetilhøyrsløse for Markane mellom dei som bur i området.

Fleirtalet i undersøkinga meiner at Kjøs grunnkrins bør tilhøyre den samanslegne kommunen mellom Hornindal og Volda. Undersøkinga gjev likevel ikkje klart svar på kva kommune innbyggjarane i Kjøs grunnkrins meiner dei bør tilhøyre. Sjølv om 52 % svarar Hornindal mot 45 % som svarar Stryn, er denne forskjellen innanfor feilmarginane. Det er med andre ord ikkje noko signifikant forskjell mellom kva kommune innbyggjarane føretrekker å høyre til. Det er likevel større skilje mellom

bygdene. Heile 92 % av dei som har svart i området Aasen, Maurset, Øyane og Øyebakken, meiner at Kjøs grunnkrins bør høyre til Stryn kommune. I dei andre områda i krinsen er det 62 % som meiner nye Volda kommune.

Rapporten i sin heilskap ligg på Fylkesmannen si heimeside

Kommunane og fylkeskommunen sine innspel til eventuell grensejustering

Kommunane og fylkeskommunen skal få høve til å uttale seg før det blir fatta vedtak, jf. inndelingslova § 9, jf. rundskriv H-10/15 (oppdatert mars 2017).

Vi ber spesielt om at kommunane uttaler seg om kvar av dei to alternative grenseløysingane. Dersom kommunen meiner at andre grenseløysingar er føremålstenlege ber vi om at desse blir grunnjevne - og illustrerte gjennom koordinatar og kartfesting.

Brevet går i kopi til kartverket, og vi ber kartverket spesielt vurdere om grensene som går fram av innbyggjarinitiativet teknisk sett er gode.

Frist for å sende inn høyringsinnspel er **22.11.2017**.

Vidare prosess

Innbyggjarundersøkinga, faktautgreiingane og høyringsinnspela vil danne grunnlaget for Fylkesmannen si oppsummering og tilråding til KMD. Vi tek sikte på sende tilrådinga innan 22.12.2017.

Med helsing

Anne Karin Hamre

Anne Kristin Eitungjerde
juridisk sjef

Brevet er godkjent elektronisk og har derfor ikkje underskrift.

Adresseliste

Hornindal kommune

Stryn kommune

Sogn og Fjordane fylkeskommune

Møre og Romsdal fylkeskommune

Vedlegg:

Utgreiing frå Hornindal kommune

Utgreiing frå Stryn kommune

Kopi med vedlegg til:

Fylkesmannen i Møre og Romsdal

Kartverket Trondheim, postboks 600 Sentrum, 3507 HØNEFOSS